

四庫全書

史部

欽定四庫全書

史部

皇朝通志卷一百二十二至
六

編修臣錢樾覆勘

總校官編修臣倉聖脉

欽定四庫全書

皇朝通志卷一百二十二

災祥畧

臣等謹按史家誓志五行始自漢書詳列五行傳說及其占應後代作史者皆因之入主致中和則天地位萬物育其機甚捷其理甚微而為災異之學者必欲條分縷析述事以求其應有不合又旁引曲證以傳會其說此鄭樵所以斥為欺天之學

也鄭氏作災祥畧專記實迹而削去五行相應機
祥術數之說誠通論已續通志既踵其體例編次
成卷我

國家重熙累洽庥和之氣暢垓汴埏實無所謂變異
之徵如前史所載者至於

列聖相承敬

天勤民之心傳為

家法

皇上體中和之極賅對育之原

兢業淵衷無時暫釋故不因見祥而喜亦不待見災而

凜用以承

景貺而集麻徵蓋

聖心即

天心也茲謹就

國初以來事蹟依類臚於卷內庶幾傳信徵實用以

仰見欽若

天道敬授人時之

至意焉

紀災

天類

地類

臣等謹按鄭氏災祥畧綜春秋迄隋千有餘年之事蹟志天則次以日月星志地則次以水旱而月與五星之薄蝕凌犯不載雷電雪霜冰雹之異不登蓋名之為畧固與史家五行志體例各殊也惟考鄭氏志於天則有天裂天鳴諸異於日則有衆

日並照日夜出諸異於月則有兩月並見月晝明
諸異以類相從我

朝至治光昭天地交泰既無此變徵則原書類例自
當酌刪若夫堯湯水旱為上世所不能無

列聖屢念黎元如傷在抱

皇上周咨民瘼

宵旰勤求每遇閭左偏災立加撫卹是以水旱之數較
之前史為獨多者前代水旱之來未必盡皆入告

而我

朝則隱飾有譴稽遲有罰則無不上達之隱也前代
于水旱之告未能盡皆邀卹而我

朝則賑貸有法蠲除有令則無不下究之澤也若依
鄭志之例但書作某郡水某郡旱而不臚載

恩施則

聖朝之厚澤深仁超越千古者無由共見若於一邑一
隅之旱澇並皆叙列則事不勝書且賑卹蠲免之

條又當入之食貨門而不在災祥占驗之科矣今
惟舉其事之大者類繫於篇

天類

順治元年八月丙辰朔日食在張宿八度十八分
食二分有差二年十二月己卯朔日食食不及一
分是日陰雲不見五年五月乙丑朔日食在甯宿
十一度七分食九分有差七年十月辛巳朔日食
在亢宿二度十五分食七分有差十四年五月癸

卯朔日食在觜宿二度十二分食六分有差十五年五月丁酉朔日食在畢宿六度五十七分食四分有差康熙三年十二月戊午朔日食在斗宿二十一度二十分食八分有差五年六月庚戌朔日食在井宿九度四十五分食九分有差八年四月癸亥朔日食在婁宿十一度食五分有差十年八月己卯朔日食在張宿九度二十九分食一分有差十五年五月壬午朔日食食不及一分二十年

八月辛巳朔日食在翼宿初度二十三分食三分
有差二十四年十一月丁巳朔日食在心宿一度
二十二分食二分有差

聖祖仁皇帝諭大學士等曰天象稍有愆違即當修省或
施行政事有未當歟或下有冤抑未得伸歟廷臣詳議
以聞二十七年四月癸卯朔日食在婁宿十度五十九
分食九分有差

諭大學士等曰欽天監奏四月朔日食凡應行應革之事

其令九卿詹事掌印科道集議以聞二十九年八月己未朔日食在張宿九度二十分食二分有差三十年二月丁巳朔日食在危宿十度五十二分食三分有差三十一年正月辛亥朔日食在虛宿九度三十四分食五分有差先期

諭禮部曰天象之變見於歲首朕兢惕靡寧力圖修省其罷元旦行禮筵宴至是

覽欽天監所奏日食占驗有大臣黜近臣有憂之語

論大學士等曰朕觀自古帝王于不肖大臣正法者頗多
今設有貪污之臣朕得其實亦必置之重典此皆係於
人事凡占候當直書其占語今欽天監往往揣度時勢
附會陳說如去年視有旱狀則用天時亢旱之占譸張
殊甚可傳欽天監諭之三十四年十一月己未朔日食
在尾宿三度二十六分食八分有差三十六年閏
三月辛巳朔日食在婁宿一度五十七分食十分
有差

論大學士曰日食雖可預推然自古帝王皆因此而戒懼
蓋所以敬天變修人事也若庸主則委諸氣數矣可諭
九御有宜修改者悉以聞四十三年十一月丁酉朔日
食在心宿一度二十六分食四分有差四十五年
四月戊子朔日食在胃宿八度十八分食六分有
差四十七年八月甲辰朔日食在翼宿一度四十
二分食五分有差四十八年八月己亥朔日食在
張宿九度二十六分食四分有差五十一年六月

癸丑朔日食在井宿十度三十二分食五分有差
五十四年四月丙寅朔日食在婁宿十二度十九
分食六分有差先期

諭大學士九卿曰自古帝王敬天勤政凡遇垂象必實修
人事以答天戒其係國計民生有應行應改者詳議以
聞五十八年正月甲戌朔日食在危宿初度四十五分
食七分有差

諭大學士九卿曰元旦日食以陰雲微雪未見別省無雲

之處必有見者况日值三始人事不可不謹政或有闕
失諸臣確議以聞五十九年七月丙寅朔日食在柳宿
五度十六分食七分有差六十年閏六月庚申朔
日食在井宿二十九度四十二分食二分有差
雍正八年六月戊戌朔日食在井宿二十度四十
二分食九分有差先期

世宗憲皇帝諭大學士等曰朕御極以來七年之中未遇
日食今欽天監奏稱六月朔日食朕心甚為畏懼時刻

修省內外臣工宜共相勉勗以凜天戒尋山西巡撫以
至期陰雨不見食稱賀江寧織造以是日陰雨過
午晴明日光無虧稱賀俱奉

旨切責又

諭大學士等曰天象之災祥由於人事之得失若

上天嘉佑而示以休徵欲人之知所黽勉永保令善於勿
替也若

上天譴責而示以咎徵欲人之知所恐懼痛加修省也日

食乃

上天垂象示儆所當敬畏詎可以偶爾觀瞻之不顯而遂
誇張以稱賀乎山西偶值陰雨不可以槩天下江南日
光不虧朕推求其故蓋日光外向過午之後已是漸次
復圓之時所虧止二三分是以不顯虧缺之象昔年遇
日食四五分之時日光照耀難以仰視

皇考親率朕同諸兄弟在乾清宮用千里鏡測驗四周以
紙遮蔽日光然後看出又豈可因此而怠忽天戒稍存

縱肆之心乎慶賀之奏甚屬非理大違朕心宣諭中外
知之九年十二月庚寅朔日食在斗宿初度二十六分
食九分有差十三年九月丁酉朔日食在角宿二
度五分食八分有差

乾隆七年五月己未朔日食在畢宿七度十七分
食七分有差十年三月癸酉朔日食在壁宿六度
四十九分食一分有差十一年三月丁卯朔日食
在室宿十一度二十三分食六分有差先期二月

上諭大學士等曰本月十六日月食三月初一日日食且自上冬以及今春雨雪稀少土膏待澤朕敬天勤民之心倍增乾惕所望大小臣工共體朕意加修省迓天和夫修省之道以實不以文其有關於民生國計者當盡心籌畫竭誠辦理以盡職守若朕躬有愆謬政事有關失應行陳奏者即據實以聞不得避忌瞻徇亦不得牽引虛文負朕諮詢之意十二年七月己丑朔日食在柳宿六度三十三分食二分有差

十六年五月丁酉朔日食在昴宿七度三十七分
食四分有差

諭曰日食天象之大者自古重之顧僅以引咎求言虛
文從事夫豈應天以實之義乃者五月丁酉朔日有
食之朕自惟宵旰憂勤無時不深乾惕寧待懸象著
明始知戒謹然遇災而懼罔敢不欽戒懼修省惟崇
實政行在鑿儀衛早晚鼓角是日著停止一日以示
撤懸齋戒我君臣當就常存之敬畏倍加謹凜並修

實政即如朕向來巡幸地方官惟修治道途此外一
無華飾自乾隆十三年東巡該撫等於省會城市稍
從觀美後乃踵事增華雖謂巷舞衢歌輿情共樂而
以旬月經營僅供途次一覽實覺過於勞費且耳目
之娛徒增喧聒朕心深所不取今歲恭遇

皇太后萬壽兆庶亦藉以申祝嘏之忱是以俯順民情至
朕待督撫有司惟因其能實心辦事令地方日有起
色方加恩獎予而不知朕心者未必不以辦差華美

求工取悅為得計將玩視民瘼專務浮華此風一開於吏治民風所關者甚大嗣後以違制論諭中外知之二十三年十二月癸丑朔日食在斗宿一度五十分一分食八分有差

諭大學士九卿科道等曰春秋書日食古聖克警天戒惟是為兢兢茲者季冬之朔日食至八分之多望日又值月食一月之間雙曜薄蝕災莫大焉我君臣當動色相戒側席修省念邇年來西陲底定殊域來歸

克奏膚功皆仰賴

上蒼福佑在朕宵旰殷懷無刻不以持盈保泰為惕並非
出於矯強亦中外臣民所共知第人情當順適之時
檢持或有未至昔人所稱人苦不自知良非虛語夫

天心仁愛人事宜修倘用行政之間有所闕失而不力
為振飭何以裨政治而召休和在廷諸臣共襄治理
寅恭夙夜宜有同心其各抒所見據實敷陳無有隱
諱二十五年五月甲辰朔日食在參宿一度十七分

食九分有差

諭大學士等曰序臨北至一陰始生薄蝕適逢益切乾
惕所有本月朔內廷例用龍舟上年既以禱雨不行
今雖際時和並飭停止用申祇荷

天仁示戒之至意二十七年九月庚申朔日食在角宿三
度二十六分食五分有差二十八年九月乙卯朔日
食在軫宿六度一分食七分有差三十四年五月
壬午朔日食在畢宿八度三十八分食三分有差

三十五年五月丁丑朔日食在昴宿七度三十四分食三分有差三十八年三月庚寅朔日食在室宿十二度三十七分食四分有差三十九年八月壬午朔日食在張宿十度五十三分食三分有差四十年八月丙子朔日食在張宿初度六分食四分有差十二月甲辰朔日食在斗宿二十三度四十三分食一分有差四十九年七月甲寅朔日食在柳宿十六度二十一分食一分有差五十年七

月戊申朔日食在柳宿五度三十五分食四分有
差十二月以明年正月元旦日食

命停止朝賀並

宣諭中外

諭曰五十一年正月初一日日食業經頒諭停止朝賀
其救護典禮禮部遵例奉行朕仍於內殿恭設香案
虔申祈禱以答

上天垂象儆惕修省之意至於下詔求言史冊所稱朕以



為轉涉虛文蓋事

天以實為人君者敬

天勤民躬理庶務日慎一日乃職分所當然即大臣言官
應行陳奏事件原當隨時入告豈待日食然後求言
况今每日御便殿聽政批答章奏大學士軍機大臣
及九卿科道等不時召見諮詢政務即外省自督撫
至道府無不隨到宣召未致民隱壅於上聞詎因日
食方始下詔求言耶至薄蝕天變日時度數有定昔

宋仁宗康定元年正月丙辰朔應日食先時日官楊維德等請移閏於庚辰年則日食在前月之晦帝曰閏所以正天時而授民事其可曲避乎不許所見甚為合理蓋凡日食必以合朔移於晦日尤為非是又考漢唐以來如光武帝建武二年北魏孝文帝延興四年太和十四年唐太宗貞觀六年均以正月朔日食昔我

皇祖時以康熙三十一年及五十八年正月朔日食且三

十一年錫伯瓜爾察達呼爾等來歸喀爾喀格楚爾喀亦以屬裔來歸之事可見日食為定數而君人者則當因此益加戒懼至於以改移為消弭之說則尤斷斷不可朕踐阼之始即叩

天默禱以若蒙

天佑享國至六十年即當傳位歸政不敢如

皇祖之數逾花甲今幸五十年來壽逾古稀康強如昔惟

有宵旰勤求不遑暇逸以仰副

上天眷顧之殷

祖宗付託之重設以天變為可消弭即於今歲歸政則是
移咎後人圖卸已責如宋高宗年未六十傳位孝宗
置軍國大事於不問不獨無以對

天並無以對子朕豈肯出此乎從前推算天行度數乾隆
六十年乙卯亦當正旦日食與今歲同若於是年歸
政則值嗣子首歲元正尤屬非宜朕心亦有不忍何
若以是歲為朕臨御六十年頤和錫福之餘即以次

年為嗣子迎

麻改元之始國祥家慶

天日重光以符朕首祚之祈以紹我大清億萬年之寶命
不其懿歟然此願亦不敢期必總以猶日孜孜以靜
俟

上天垂佑耳將此通諭中外臣民咸知朕意

臣等謹按鄭氏災祥畧但紀日食而不及月食蓋
以日為陽象故春秋書法特重日有食之今從其

例

右日食

順治九年九月太白晝見是月乙未辰時太白見於翼宿三度丙申酉時有流星起中天入紫微垣時

世祖章皇帝將巡塞外以

上天垂象即行停止

康熙三年十月彗星見東南方是月己未朔彗星

見於軫宿之次在左轄星之旁其體微小每夜逆行尾迹漸長經翼張井昴胃諸宿至十一月庚戌在婁宿之次

聖祖仁皇帝諭議政王大臣曰星象示異皆因德薄敷政失宜所致今惟力圖修省務期允當以答

天心四年二月彗星復見先是三年十二月壬戌彗星移奎宿之次其體漸小四年正月癸巳不復見二月己巳復見東南方在女宿之次闕十餘日經虛室

璧三宿

諭曰異星復見實由德薄所致

上天垂象屢示警戒敢不並圖修省以後凡用人行政務
加敬慎以求允當至於關係國家利弊民生休戚應興
應革事宜內而部院及科道官外而督撫其各抒所見
以備採擇朕不憚改正七年五月太白晝見是月甲辰
未時太白見午位在柳宿三度丙午庚戌同癸丑

諭曰太白晝見

天象屢示儆戒朕甚懼焉今力圖修省彌加敬慎勵精勤政以答

天心在內部院官各盡乃職公廩自効在外督撫提鎮以下各綏理地方撫恤軍民咸令得所二十一年七月彗

星見東北方是月己巳彗星見於井宿之北其色

白尾迹指西南壬申行東北尾迹長六尺餘癸酉

諭大學士等曰天道關於人事彗星上見政事必有闕失

其應行應革者令九卿詹事科道會議以聞

乾隆七年正月異星見東南方是月丙戌異星見于斗宿之次在天弁第二星之上其色黃白向西北逆行四十餘日隱伏八年十一月彗星見是月己亥彗星見奎壁之中距奎宿第二星二度體如彈丸其色黃尾迹長尺餘每夜向西逆行由戌宮至亥宮十二月丁卯

上御門聽政畢

召大學士等前曰星象見異朕思

天心仁愛垂象示儆必政事之間有所缺失我君臣當夙
興夜寐勤加修省以回

天意惟是應天以實不以文修省之實非徒託之空言也
且書不云乎王省惟歲今歲序將周正其時矣我君
臣必深思所以致此之由缺失何在亟圖峻改庶幾
盡事天之道有以感召和氣而消未萌之眚也癸酉
諭曰昨召見大學士陳世倌據奏近日彗星見宜下修
省之詔宣示百官朕思人主君臨天下敬天勤民之

心必嚴恭寅畏無時不凜

上帝之鑒觀念兆人之休戚以期弭咎於未然誠以修省全在乎平日此朕之所以夙夜兢兢者事

天以實不以文以誠不以偽也若但托於文告飾為敬慎警懼之詞而無引咎責躬之實徒務臣民之觀聽以塞責是明以示戒而更加粉飾則欺世慢天其過愈大豈能感召天和潛消沴戾乎前日御門時朕面降諭旨原欲與大臣等交相儆省深思所以致此之由

缺失何在亟圖悛改格天之道惟在乎修省之實而不在修省之文我君臣共勉之十三年三月客星見東方是月癸丑客星見於室宿第三星之南一度其色黃向東順行至次日即消二十四年三月彗星見東南方是月甲午彗星見於虛宿之次其色蒼白尾迹長尺餘指西南每夜順行十餘日伏不見四月戊辰復出西南方在張宿第二星之上體勢甚微向東順行至五月初仍隱伏至十一月

戊辰有客星見東南方在未宮井宿四星之下自
未宮行至酉宮胃宿之次尋亦隱伏三十四年七
月彗星見東南方是月甲辰彗星見于昴宿之次
體如彈丸其色蒼白尾迹長二尺餘指正西偏南
每夜順行八月望後伏不見十月復移見西方尋
即隱伏三十五年閏五月客星見東南方是月己
酉客星見于斗宿之次在天弁第一星之西其色
蒼黃每夜向北行十餘日即隱伏十一月彗星見

東南方是月彗星見于柳宿之次在第一星之下
色蒼白尾迹長尺餘指南每夜向北行十餘度七
日隱伏

右星變

欽定四庫全書

皇朝通志卷一百二十三

災祥畧二

地類

順治二年河決考城之劉通口時河流北徙自午
溝至徐州河身漸涸至四年決口始塞河流疏通
三年直隸成安等縣水按分數免賦六年直隸真
定順德廣平大名四府屬山西太原平陽汾遼澤

五府州屬水並免額賦八年蘇州松江等府屬水
發銀米賑濟九年河決邳州水三日即退十三年
河南衛輝府屬湖南常德府屬水並免額賦十五
年河決山陽之柴溝姚家灣塞之是年湖北地方
水又浙江寧波紹興二府沿海地方水並按分數
免賦十六年江南蘇州揚州淮安徐州鳳陽等屬
水全免舊欠錢糧十七年河南河決睢州杞縣虞
城柘城永城夏邑等處水又江南邳州蕭縣宿遷

沭陽等處水並按分數免賦十八年直隸霸州保定新城等州縣江西鄱陽等縣湖北沔陽黃梅廣濟等州縣水並按分數免賦

康熙元年江南鳳陽泗州等屬福建閩縣等十二縣陝西西安鳳翔興安等屬水並按分數免賦二年直隸河間等處以夏潦被水按分數免賦並遣官經理修隄挑淺事宜三年松江上海等處水蠲免額賦四年河決安東之茆良口等處至十年以

次堵塞七年河決桃源之黃家嘴次年堵塞是年直隸真定等五十州縣江南淮揚二府屬水分別免賦八年河決清河之三汉口次年復決清河之王家營等處

詔命河道總督羅多創築縷隄以次堵塞是年陝西南鄭等處水按分數免賦九年直隸博野等二十九州縣江南蘇松淮揚四府屬浙江嘉湖二府屬水並按分數免賦淮揚被水較重

特命部院大臣往勘水災發帑賑給並罷本年漕運自康熙六年以後民欠銀米盡皆豁免十年淮安揚州水蠲免正賦自康熙元年至六年逋賦全免十一年揚州府屬水全免本年額賦十二年直隸霸州寶坻等十三州縣江南六安贛榆等州縣水並按分數免賦十三年揚州高郵寶應泰州鳳陽泗州滁州等處水蠲地丁銀漕次年仍免賦有差十四年河決徐州之潘家堂及宿遷之蔡家樓俱塞之

是年淮揚徐鳳四府屬水按分數免賦十五年黃
水倒灌洪澤湖決高堰三十四處時黃淮合併東
下漕隄多潰

詔遣工部尚書冀如錫戶部侍郎伊桑阿往視興工

命尚書靳輔為總河於十七年次第堵塞是年淮揚徐所
屬水

特遣大臣往江南發銀米賑濟次年仍蠲免額賦十七年
淮揚徐各屬水蠲停地丁漕項有差十九年淮揚

蘇松常鎮等處水蠲停止賦並發帑賑濟二十一年五月河決宿遷之徐家灣塞之六月河決宿遷之蕭家渡是年大修兩河各隄工告竣至次年三月塞蕭家渡口河歸故道二十一年揚州高郵寶應泰州興化等處水蠲停止賦二十四年直隸河間獻縣等縣江南宿遷興化邳州高郵鹽城等州縣山東郟城魚臺等縣水蠲免額賦二十六
年直隸霸州文安保定武清寶坻玉田豐潤等州

縣江南淮揚二府屬水並按分數免賦二十七年
江南興化亳州邳州等州縣水按分數免賦並發
穀賑濟二十八年江南邳州等九州縣復水仍按
分數免賦二十九年江南六合等十五州縣衛浙
江紹興府屬水按分數免賦並撥穀賑濟三十年
雲南昆明等十州縣水按分數免賦三十二年直
隸順天保定河間永平四府水全免明年額賦三
十三年福建閩清等縣水撥穀賑濟三十五年黃

淮秋漲江南淮揚徐等處水撥米賑濟至次年復
截留漕米散給並全免額賦是年直隸三十二州
縣湖北九州縣衡水並按分數免賦三十六年江
南山陽高郵泗州潁州等處江西星子等縣水並
按分數免賦三十七年福建臺灣地方水撥穀賑
濟淮安揚州鳳陽府屬水並免額賦三十八年江
南海州泗州盱眙等州縣湖北安陸府沔陽州等
處水按分數免賦三十九年江南水泗州盱眙高

郵清河及上江潁上等六州縣下江邳州等十六
州縣各按分數免賦並除淮安揚州鳳陽三府上
年額賦四十年五月泗州盱眙等處水時修築商
家堰閉塞六壩從洪澤湖水長泛溢泗州盱眙等
處被淹

命總河張鵬翮會同兩江督臣阿山親行察勘蠲停額賦
四十一年山東濟兗青三府屬萊蕪新泰等州縣
水全免明年額賦並發穀賑濟四十二年山東水

凡九十四州縣

詔截留漕糧遣官前往分路散賑並全免明年額賦四十年江南江寧淮安揚州三府屬浙江寧波紹興二府屬廣東肇慶府屬湖北沔陽等州縣湖南岳州等州縣水撥穀賑濟並按分數免賦四十五年江蘇海州等十二州縣安徽潁州等州縣衡水按分數免賦四十七年江南蘇松等五府屬浙江湖州衢州台州各屬水發穀賑濟並免明年額賦四

十八年直隸武清等十三州縣水設廠賑濟並按
分數免賦四十九年直隸霸州等七州縣江南邳
州等十三州縣河南商邱等三十九州縣水發穀
散給並按分數免賦五十年江蘇海州等十五州
縣衛水按分數免賦五十二年廣東三水等縣福
建侯官等縣水全免額賦五十四年江南太倉長
洲等十四州縣衛湖廣江夏嘉魚等州縣水發穀
散給並停免額賦是年直隸順天永平保定河間

宣化五府屬水發米賑濟全免額賦五十五年江
南上元宣城等州縣衛浙江衢嚴二府金華新城
等三十州縣廬州等七衛水發穀賑濟按分數免
賦五十七年江南桐城等三十州縣廬州等七衛
水發穀賑濟按分數免賦五十八年江南高郵等
州縣水按分數免賦五十九年江南淮揚二府屬
湖廣漢川潛江等州縣水發穀賑濟按分數免賦
六十一年直隸長垣等州縣山東壽張等州縣以

黃汎驟漲被水發穀賑濟

雍正元年河南中牟直隸長垣等州縣黃水漫溢
發帑賑濟其陽武封邱中牟三縣各免五年額賦
二年江浙沿海州縣潮災發帑賑濟分別免賦直
隸山東河南三省雨水過多成災者一體給賑三
年直隸霸州薊州等七十四州縣衛河南祥符等
十九州縣水發倉給賑按分數免賦有差又山東
歷城等五十三州縣衛所水並免正賦福建廣東

被水地方亦分別賑卹四年安徽所屬之舒城無
為望江等州縣水發米煮賑其泗州災重處按戶
給銀又浙江仁和等州縣水按災分免額賦五年
直隸玉田等二十三州縣水遣官賫銀分路散給
又湖北江水溢被災之江陵漢陽等州縣及武昌
荊州等衛盡除本年田賦七年雲南曲靖府屬水
按分數免賦八年北河溢直隸順德廣平大名等
府水遣侍郎副都統等分四路散賑又山東河南

江南瀕河州縣被災者一體賑卹十一年江南海
溢蘇州松江二府屬之常熟華亭等二十九州縣
水如例賑卹又直隸之薊州豐潤等處水並蠲賑
有差十二年江南徐州府屬州縣水分免正賦有
差十三年四川綦江合江等州縣水各免今年租
乾隆元年浙江仁和錢塘等縣湖北漢川江陵等
縣水免正賦及漕米有差二年河南西華等縣水
按分數免租四年安徽宿鳳等十五州縣水免本

年銀糧五年江蘇豐沛等十州縣衛水免丁屯蘆
課河租各銀糧六年江南鳳陽潁州等府水分賑
災民其上元等二十八州縣並免其年額賦七年
江南黃淮交漲兩江水江蘇所屬江浦等州縣衛
安徽所屬之壽州等州縣衛各蠲租截漕

命大臣會同督撫勘賑是年湖北荊州安陸漢陽襄陽
德安五府湖南長沙岳州常德澧四府州江西贛
州吉安南安三府水各按分數免其年田租十一

年淮黃漲江南沿河州縣水免額賦並截漕充賑
十二年山東九十八州縣水免額賦截留山東河
南漕運並撥天津倉米充賑是年江南海潮溢江
蘇崇明寶山上海南匯鎮洋常熟昭文江陰等縣
水蠲稅截漕有差十三年山東鄒平等二十州縣
水截漕加賑

命重臣巡視賑務十五年江蘇安徽二十七州縣水按
分數賑濟免災田地漕銀糧十八年黃淮漲淮揚

徐府屬水尋以河決銅山隄宿靈虹泗等州縣亦
水

命大臣往視發帑截漕並撥附近各省米賑糶免今年
租十九年江南淮揚雨潦下江等處復水賑如例
其安徽泗盱等州縣亦分免額賦二十年江南淮
揚徐水按分數賑卹設粥廠是年浙江杭州湖州
紹興府所屬亦水

予賑如例二十一年江南宿虹豐沛等十六州縣山東

金鄉魚臺等縣水各蠲免按分數賑卹是年河南
歸德府之夏邑商邱永城虞城等縣并陳許兩府
州屬各縣亦以霖雨被水除田租免逋賦次年

特遣官查視優卹並以工代賑疏濬渠道引積水達於
河二十二年漳河暴漲注衛河免直隸山東之被
水州縣賦並發粟散賑給銀葺居二十六年河南
久雨河溢祥符等縣水蠲卹

命大臣會勘賑濟設粥廠直隸之大名天津山東之德

州曹州均以水截漕亢賑是年建楊橋

河神祠先是七月河溢遂潰楊橋堤乃築引渠醜河溜兩匝月而合龍爰建祠並

頒額勒碑從大學士劉統勳請也二十七年直隸靈雨所屬四十五州縣水按分數加賑又江蘇之清河等十一州縣浙江之仁和等十七州縣均以水蠲免漕賦三十年山東濟南等屬十五州縣江南安池等五府屬水均蠲賑如例三十二年下江上元

卷一百二十三
等十一縣上江懷寧等十三州縣江西南昌等十
三縣湖北黃梅等十三州縣水蠲卹如例復

命於正賑外各按分數加賑三十五年直隸各屬水

諭部臣撥銀運米賑濟其浙江十四州縣災加賑亦如
之是年古北口山水驟發

特遣大臣齎銀運米逾格賑之三十八年江南水安東
山陽阜寧清河沐陽海州大河衛宿逋令勿收責
三十九年安徽壽州鳳陽等十州縣衛水分別蠲

緩有差是年又因黃水驟漲免山陽清河鹽城阜
寧明年租並淮安大河二衛漕賦四十年直隸霸
州永清等十四州縣水於例卹外加賑一月四十
三年黃河溢河南災

命重臣稽查截漕發帑賑之四十四年河南儀封延津
等十三州縣水蠲賑如例四十五年直隸霸州文
安等二十州縣水賑卹有加是年張家油房漫口
河南考城等五縣水均加賑四十六年江南黃水

溢上江之鳳泗等州縣下江之邳睢等州縣禾稼
受傷撥銀截漕賑之並分別加賑四十七年黃河
溢河南山東江南水

特命於例賑外各展賑

皇上屢念江南豐沛等縣及山東兗曹濟各屬災甚

諭令常予賑卹災退後乃停四十八年重修雍正六年
所建之惠安觀先是四十六年冬青龍岡漫口合

龍

敕建

龍王廟以昭神貺四十七年更築新堤挑引渠自蘭陽至商邱一百七十餘里至是挑汎開放河流永

慶安瀾大學士公阿桂等奏要工合龍全賴

河神默佑請將蘭陽北岸惠安觀鳩工重修得

旨允行並

御書祠額刊詩以紀事焉四十九年黃河溢河南安徽

等處水蠲租除欠

諭地方大吏督屬攜帶錢米分途賑卹其河南之商邱
寧陵安徽之亳州等州縣分別加賑展賑有差

右水災

順治三年湖廣興國等十州縣旱按分數免賦八
年江南寧國等府旱按分數免賦九年江南旱

命督撫等按視災傷江蘇等處改折漕糧免派耗米安徽
諸屬蠲免正賦十一年直隸山東浙江江南等處
俱旱直隸八府屬山東二十一州縣浙江二十二

州縣江南五州縣並按分數免賦十四年四月京

師旱

世祖章皇帝素服禱於

圜丘遣官致祭

方澤壇

社稷壇

神祇壇應時大雨十六年江西四十五縣湖南澧州等

州縣貴州貴陽等府屬旱並免額賦十七年六月

京師旱

諭禮部今夏亢暘日久農事堪憂朕念致災有由痛自刻責穀為民天非雨不遂竭誠祈禱積有日時乃精誠未達雨澤尚稽晝夜焦心不遑啟處茲卜于月之十三日預行齋戒黎明步至

南郊於夜子刻祭告

圜丘懇祈甘霖速降以拯災黎若仍不雨則再行躬禱務

回

天意尋又

諭先詣

郊壇齋戒三日以十五日之夜子刻祭告屆日丙申

親率諸王文武羣臣素服步至

南郊齋宿是日四際無雲頃之陰雲密布甘霖即降越三日戊戌行禮于

園丘祭畢雨復大霈十八年江南青浦等二十七縣衛浙江二十九縣旱並按分數免賦

康熙三年江西四十一州縣旱按分數免賦四年

三月京師旱

命禮部遣官同河道總督朱之錫往泰山祈雨五年湖北

沔陽黃岡等十二州縣江西寧州等三十五州縣

旱並按分數免賦九年直隸開州等十四州縣山

東濟陽等二十九州縣旱並按分數免賦十年四

月京師旱

聖祖仁皇帝諭旨深自刻責即詣

南郊禱雨前期致齋三日素服詣

壇致祭甘霖立沛是年鳳陽廬州安慶等府旱

特遣部臣會同江南督撫截漕散賑並於江寧省會之地

大設粥廠賑濟流民十三年山東泰安等五十二

州縣旱按分數免賦十六年江西新建浮梁等十

六州縣旱按分數免賦十七年六月京師旱

諭禮部朕惟天人感召理有固然人事失於下則天變應

於上捷如影響豈曰罔稽天氣亢暘禾苗枯槁朕夙夜

靡寧力圖修省躬親齋戒虔禱甘霖前期致齋屆日自西天門步行至

壇行禮時甘霖大沛是年江南鳳廬滁三屬旱按分數免

賦並改折漕糧十八年蘇松府屬旱按分數免賦

詔發帑令江蘇巡撫等親行督賑二十年蘇松常鎮府屬

旱分別蠲折額賦廣行設賑二十二年江西分宜

等十七縣旱按分數免賦二十三年直隸邢臺

等二十州縣湖北江夏等十五州縣旱按分數免

賦二十五年鳳陽徐州等處旱發銀米賑濟二十
六年五月京師旱

諭九卿等曰京師為天下根本之地乃幾月不雨朕甚憂
之欲躬行祈禱大小臣工宜盡誠齋戒毋循故事屆期
上親製祭文素服自西天門步行詣

壇行禮即時雨足是年江西宜春等十縣旱按分數免賦
二十八年六月京師旱

御製祭文遣官禱雨於

園丘是年直隸順天保定河間真定順德廣平大名及宣
化各府屬俱旱

詔遣官詳勘先行發賑並免去年未徵及本年春夏額賦
又湖北武昌等四府屬二十州縣四衛荊州安陸
等二府屬九州縣四衛旱先行賑濟免明年春夏
額賦江西寧州袁州等三十二州縣衛旱按分數
免賦二十九年山西太原大同二府屬旱撥穀賑
濟河南開封彰德衛輝懷慶四府屬甘肅涼州等

衛所旱按分數免賦三十年陝西西安鳳翔二府
屬旱

命大臣往勘撥銀賑濟並免明年民屯各銀米又直隸七
十七州縣河南二十三州縣旱按分數免賦三十
一年山西蒲州解州等州縣旱撥穀賑濟江南六
合等十三州縣旱按分數免賦是年陝西西安鳳
翔連歲遭旱撥銀米賑濟明年

上猶念陝西災民復免康熙三十三年額賦三十二年山

西平陽澤州沁州所屬旱

詔加賑濟全免積年逋賦三十三年直隸安州等十一州

縣旱

命戶部遣官散賑發糶並免明年額賦又湖廣黃州府屬

黃岡等州縣武昌府屬江夏等州縣旱並按分數

賑濟三十四年山西平陽府屬江西新淦建昌南

康等縣旱停免額賦三十六年直隸霸州等十七

州縣旱按分數免賦三十七年直隸豐潤等二十

二州縣旱撥穀賑濟四十年甘肅河州等處旱

詔巡撫親行散賑於較重之蘭州隴西安定等設廠煮粥

其西安被旱之二十六州縣衛所並按分數免賦
四十二年浙江衢州府屬湖南長沙等三府屬旱
並按分數免賦四十三年山東歷城等三十一州
縣衛旱發穀賑濟四十五年湖廣漢川等十五州
縣衛旱撥穀賑濟四十六年江南浙江旱

詔截漕散賑免兩省明年丁銀積欠漕項四十九年福建

泉州漳州等屬旱截留漕糧散給並停徵本年額
賦五十年江南六安等州縣旱按分數免賦五十
二年甘肅靖遠環縣等十四州縣衛旱全免額賦
五十三年江南上元桐城等五十四州縣浙江錢
塘山陰等十六州縣湖廣嘉魚等十七州縣旱撥
米賑濟並按分數免賦五十四年甘肅寧州等五
州縣衛靖遠等二十八州縣衛旱

詔遣大臣巡視兼賑銀米全免明年額賦五十五年五月

畿輔旱

聖祖駐蹕熱河減膳齋戒

諭京師虔誠祈雨越七日雨足始復常膳五十七年湖廣

武昌鍾祥等十九州縣衛甘肅涼州古浪等衛旱

按分數免賦五十八年甘肅會寧等十七州縣衛

浙江錢塘等二十一州縣旱撥米賑濟蠲免額賦

五十九年山西平陽汾州二府屬陝西宜川等縣

衛旱發倉賑濟按分數免賦六十年陝西旱

詔發銀米遣部員三路散賑江南徽州府歙縣等十二州
縣浙江杭州府仁和等三十九州縣旱發倉賑給
按分數免賦六十一年直隸贊皇等四十二州縣
山東濟南兗州東昌青州四府屬州縣湖北鍾祥
等州縣旱撥穀賑濟按分數免賦

雍正元年五月京師旱

世宗憲皇帝諭禮部虔誠祈雨並減膳齋戒精虔致禱甘
雨大沛羣臣諄請乃照常進膳是年直隸河南山

東旱發倉穀帑銀及截留漕米各遣官散賑又下
江蘇松常鎮府屬之太倉溧陽等州縣上江廬州
府屬之合肥舒城等縣浙江仁和富陽等州縣及
台州衛嚴州所被旱者分別免賦二年春直隸旱
親詣黑龍潭致禱越數日

親祭

歷代帝王廟甘雨大沛臣工衣盡沾濕各加

恩賜

御製喜雨詩羣臣敬和是年湖廣岳州臨湘等縣衛旱按
分數免賦三年山東平原等十七州縣衛旱免賦
有差

乾隆二年陝西靖邊等八州縣旱免其年租糧三
年江南安徽等處旱免帶征逋賦及本年漕糧四
年江南江常鎮淮揚徐海七府州旱免帶征應徵
正賦其海安蕭碭四州縣尤重自雍正十三年以後
逋賦悉予蠲除尋復議分別加賑八年直隸天津

河間深州等屬二十八州縣山東德州等十三州
縣旱分別賑卹是年甘肅臯蘭靖遠平蕃等七州
縣旱免額賦九年夏畿輔旱是歲四月行

常雩之禮

皇上不乘輦不設鹵簿不作樂至五月初二日奉

諭旨一春以來雨澤稀少二麥黃萎今逾芒種之期甘
霖猶未普降切恐秋禾難以布種民食堪虞朕心憂
灼思過省愆無一時之暫釋朕詣

暢春園問安

皇太后雖慈訓屢頒寬慰朕躬而每見

皇太后以天時亢旱憂形於色朕心更為不寧今日

皇太后從寢宮步行至園內

龍神廟虔誠祈禱朕敬聞之下惶悚戰慄此皆朕之
不德不能感召

天和而累

母后焦勞至於此極為人子者實無地以自容即刻前往

請

安諄懇謝罪恐衆不知以為他故並諭內外臣工知之十

三年陝西各屬旱

命河南泛粟賑之是年福建亦旱截江浙漕糧海運以

濟各蠲免如例十六年浙東五十四州縣旱截留

漕糧並撥湖廣倉米賑糶緩征蠲賦十七年陝西

三十七州縣山西十一州縣旱按分數賑濟各免

其年額賦二十三年甘肅河東西旱如例蠲賑並

分別展賑有差二十四年夏畿輔旱時於孟夏行

常雩禮

皇上以天時亢旱前期詣

壇齋宿時法駕鹵簿停止陳設翼朝由齋宮步行詣

天壇行禮五月

皇上步禱

社稷壇六月舉

大雩之禮先期徹膳虔齋

御製祝文祭日戴雨纓冠素服步詣

圜丘行禮大雨立霈四境霑足乃令直隸所屬有司勸種
晚禾酌借牛具籽種以待秋成是年甘肅臯蘭等
二十五廳州縣復旱其蠲賑視去歲有加仍分別
展賑二十九年甘肅鞏昌等府屬旱免其年租是
年江蘇江浦海州等處旱按災蠲免三十年浙江
天台新昌寧海等縣旱賑卹如例其甘肅河東西
靖遠等十四廳州縣旱

特命加賑並除歷年逋賦三十三年直隸霸州等五十
州縣廳旱分別蠲緩加賑有差三十七年甘肅臯
蘭等二十五廳州縣旱免地畝銀糧三十九年直
隸天津河間等屬十六州縣旱銀米兼賑各按災
蠲賦四十年江蘇句容等三十州縣衛安徽定遠
等十二州縣衛及甘肅臯蘭等十八州縣旱各按
災蠲免加賑展賑有差四十二年甘肅臯蘭等三
十二廳州縣旱蠲賑如例復展賑四十三年河南

旱被災較重之汲淇臨漳三縣緩徵額賦是年以
河南山東雨澤稀少將四十五年輪免錢糧即於
本年蠲免其已徵者准作明年正供四十九年河
南衛輝府屬九縣懷慶彰德開封府屬十六縣直
隸大名等屬七州縣旱免上年逋賦五十年河南
旱

命分別蠲賑有差是年山東濟南各府屬三十州縣安
徽亳州等八州縣旱截漕給賑其江蘇淮安等府

屬撥漕平糶其五十一年安徽輪免錢糧卽於是
年蠲免

右旱災

皇朝通志卷一百二十三

欽定四庫全書

皇朝通志卷一百二十四

災祥畧 三

紀祥 天類 地類 物類

臣等謹按鄭氏災祥畧詳於災而畧於祥顧自龍師鳥紀以還若圖書載易鳳凰歌詩傳為聖世之徵書策亦未嘗畧而不紀也我

國家

列聖相承敦崇實政

皇上奉若

天道軫念民依若瑞應之說久為

聖朝所弗尚蓋自

隆平奕葉以來太和洋溢協氣薰蒸在天為慶雲甘露在

地為瑞麥嘉禾草野之間習以為常既不盡聞於

疆吏其有可考見者不過千百之十一謹據實列

載用以見

到治之世

天人協應而

聖主敬

天勤民之心未嘗一日而懈固非若前史符瑞之志所可
同日語也若夫各省通志及府州縣志所紀瑞應
甚多其未經具

奏者槩不叙入

天類

順治二年正月丁亥未時日生左右珥上有戴氣
赤黃色在女宿秋江南通州及蕭縣甘露降十一
月辛亥巳時日生半暈上有戴氣赤黃色在箕宿
康熙十六年三月四川順慶府甘露降夏秋復降
二十一年江西瑞金縣甘露降徑里許閱四十餘
日

雍正三年二月以日月合璧五星聯珠告祭

景陵先是正月欽天監疏言二月初二日庚午卯刻日月

合璧五星聯珠宿躔營室之次位當娵訾之宮為
從來未有之瑞請

敕付史館

世宗憲皇帝諭大學士等曰朕惟日月五星運行於天本
有常度是以從古歷元可坐算而得然古稱高陽時五
星會於營室漢帝時五星聚於東井宋祖時五星聚於
奎史書皆紀以為祥蓋七政會合數雖一定而遭逢其
時者實海宇昇平民安物阜之會也若以為德化所致

朕方臨御二載有何功德遽能致此嘉祥皆由我

皇考六十餘年聖德神功蟠天際地為千古不世出之君
為

上天第一篤愛之子所以純禧駢集歷數綿長錫祚垂光
至於今日覩此難逢之嘉瑞朕嗣統以來兢兢業業率
由舊章惟以

皇考之心為心以

皇考之政為政宅衷圖事罔敢稍越尺寸故邀

上天垂鑒仍如

皇考之御宇綏猷而錫以無疆之福也朕幸逢嘉會不但
不敢自居亦不敢自謙總由

上天申眷

皇考朕與天下臣民同在福祐之中當與天下臣民共慶
之至是諸王大臣等請

陞殿慶賀復

諭曰朕惟

皇考六十餘年敬天勤民始終如一是以

上天申眷至於今日覩此嘉祥在

皇考為福鍾善慶之餘在朕躬為迎迓

天庥之始惟有兢兢業業竭力盡心永久如一以仰答

上天之眷祐以克承

皇考之宏猷期與大小臣工矢誠心而敦實政陞殿受賀

不必舉行但念

天瑞實因

皇考而致應遣官告祭

景陵以昭祥瑞之自六年冬江南松江府甘露降七年正

月鄂爾泰奏十月二十九日恭遇

萬壽慶辰滇南省城五色慶雲光燦捧日經辰巳午三時

至十一月絢爛倍常凡呈現兩日楚雄姚安等府

呈報皆同洵屬從來未有之嘉瑞

諭曰朕每遇此祥瑞蒙

上天慈恩自應感喜然實絲毫不敢慶幸惟倍加敬畏之

心况此嘉祥實係忠誠所感而獻於朕壽日者正表卿
愛戴之心也諸王大臣等以滇南卿雲表賀奏請宣付

史館得

旨朕治天下以實心實政為務不言祥瑞屢頒諭旨甚明
今據鄂爾泰奏滇省卿雲呈見又引孝經援神契之語
曰天子孝則卿雲見朕之事

親不敢言孝但自藩邸以至今四十餘年誠敬之心有如
一日只此一念可以自信朕每承

天眷昭示嘉祥感激慶幸之中益加儆惕茲逢卿雲之瑞
益增朕心之敬畏鄂爾泰公忠體國實為不世出之名
臣數年來節制滇黔等省是以仰邀

天貺正所以表著該省官吏敬恭協和之忱悃也願內外
大小臣工均以鄂爾泰為法且願各省官民等聞風慕
義興孝勸忠人人共受

上天之福佑乃朕心之所謂上祥大瑞也七月諸王大臣
等疏言滇省日麗中天慶雲告瑞仰見太平有象

天眷庥隆臣等不勝歡忭得

旨朕思雲霞之氣時結時散今慶雲屢見於滇南地方自
因該省大臣官弁兵民有感格

上天之處始蒙賜此休徵以示恩獎但天象之災祥由於
人心之敬肆捷於影響呼吸可通朕每承

天貺益深虔惕夙夜靡寧惟冀滇省官民愈加黽勉以仰

答

上天垂象之鴻恩十二月以五色慶雲捧日

躬詣太學

文廟祭告

命宣付史館時山東巡撫岳濬等疏言十一月二十六日
丙申午刻慶雲環捧日輪歷午未申三時之久正
當曲阜重建大成殿上梁前二日奏入

諭大學士等曰雍正二年闕里

文廟不戒於火朕心悚懼不寧親詣太學

文廟虔申祭告特發帑金修建虔恪之心數年罔間今

大成殿上梁前二日慶雲呈見或者

上帝

先師鑒朕悚惕誠敬之心昭示瑞應當躬詣太學

文廟祭告以申感慶之衷將明年會試額數廣至四百
名壬子科各省鄉試每正額十名加中一名宣付史館

乾隆元年十月卿雲三見時監臣奏本月初二初

三初五等日卿雲疊見其色鮮明為太平喜氣之

應奉

昔知道了不必交部十四年五月瑞星見大如雞子形
長而圓其色黃白光瑩潤澤而行不急按占書為
含譽星二十五年十二月欽天監奏明年正月辛
丑朔日月合璧五星聯珠時監臣推測得二十六
年元旦午初一刻合朔日月同在元枵子宮躔女
宿形如合璧水星附日月躔牛宿木火土金四星
同在娵訾亥宮躔危室二宿亦與日月附近五星
經度既屬相連而其緯度又均在黃道之南形如

聯珠且其次序水木火土金以次順生按占書曰
人君有至德則見請宣付史館奏入

諭大學士等曰據欽天監奏明年元旦午時日月合璧
五星聯珠繪圖呈覽請宣付史館朕以七政同躔互
運凌犯或所時有靈臺占候者轉指為瑞應以飾聽
聞則大不是因名諸王大臣及監臣等面詢據勒爾
森等稱五緯連貫相生不侵次舍實叶吉占並非以
視為祥等語朕於天文象緯素未深究從不強不知

以為知但思日月五星行有常度史傳所載高陽氏
時五星聚於營室年代荒遠已難具論即如漢高祖
元年五星聚東井宋開寶元年五星聚奎殆十有餘
年始一遇而其為實為偽亦莫可究及我朝雍正二
年日月合璧五星聯珠相距宋時亦已七八百年今
自乙巳至辛巳章部甫及兩周何以瑞應再覲耶據
監臣奏稱較前度為尤昭明則安知將來不有議此
度之亦不昭明者耶邇日西陲大功底定版圖式廓

遠踰二萬餘里海宇宴安年穀順成內外諸臣大法
小庶人民樂業其為祥瑞孰有大於此者乎又如今
冬京師風日晴暖正在望雪之際而六花疊降四野
均霑直隸河南山東山西等省並陸續奏報得雪而
諸回城新闢耕屯亦有盈尺告豐之奏此則祥瑞之
實而可徵者固不在乎合璧聯珠始足彰

上蒼符應也在監臣等職司觀象諒不敢妄相附會以為
潤色隆平之舉而揆之於理終難深信即使懸象著

明星文表異實為我國家世運亨嘉之盛瑞惟當益
加兢業保泰持盈用以上承

靈庥以與我天下臣民共享太平之福耳至謂元正嘉兆
適逢

慈寧七旬大慶之年可徵

萬壽延釐之祝朕惟心識之而默叩

乾貺若必宣付史館垂為慶牒則各省文武大吏必競以
甘露慶雲等事紛紛入告將日事虛文轉致貽誤實

政殊非朕敬天勤民宵旰圖治之至意所奏不必行
仍將此宣諭中外知之

地類

順治二年正月河南孟縣黃河清二日閏六月錢
塘江潮連日不至時和碩豫親王既定南京進取
浙江駐營錢塘江岸敵兵見之以為潮至必淹沒
乃江潮連日不至驚為神助相率納款三年五月
錢塘江水淺可涉時大軍征浙江偽帥等營於江

之東岸我軍未能即渡忽江沙暴漲水淺可涉都
統圖賴等策馬徑渡遂破敵兵四年陝西咸陽縣
渭水清八年十一月陝西靜寧州黃河清

康熙三年春江南安東縣黃河清八年六月山西
樂平縣鳳凰山神泉自湧土人名靈瑞泉九年春
山西滎河縣黃河清十一年二月宣化府東山廟
山泉自湧成河時

聖祖仁皇帝駐蹕東山廟舊有井易涸水不足用是日山

泉忽湧成河人馬皆給二十一年十一月山西蒲州至平陸黃河清十有五日三十五年大軍征朔漠有靈泉忽湧之異是歲

聖祖大駕親征噶爾丹四月至塔勒奇爾掘井無水及

駕至清泉忽湧導成巨流人馬資用不竭衆皆大悅五月

至延圖庫列圖地方乏水侍衛等過一平山忽泉

源湧出水極甘美充用有餘次年二月

駐蹕李家溝地方溝水甚小是日水從山溝湧出俄頃深

二三尺鄉人驚異次日至年延村山嶺險峻僅有二井

大駕甫至南山之下見有水痕衆趨視之地中各處泉湧頃刻洋溢衆咸歡呼曰如此神異誠所以佑

聖主也

雍正二年青海湧靈泉時大軍西征道經青海於塞外嚴寒之候湧泉濟軍得

旨褒封五年正月河道總督齊蘇勒副總河嵇曾筠漕運

總督張大有河南巡撫田文鏡山東巡撫塞楞額
陝西巡撫法敏等先後奏報黃河自陝西府谷縣
歷山西河南山東至江南之桃源縣河水澄清上
下三千一百餘里綿歷三旬有餘陝西山西始自
四年十二月初八日至五年正月十三日凡三十
有六日河南山東自四年十二月初九日至五年
正月十日凡三十有一日山東單縣亦始於十二
月初九日至二十二日凡十四日江南始自十二

月十六日至二十三日凡七日俱以漸復舊其清
自上而下復舊自下而上諸王大臣合詞奏稱為
從來未有之瑞懇請

陞殿受賀

世宗憲皇帝諭曰數年之中休徵疊見稽諸史冊咸稱福
慶而朕受寵若驚不以為喜實以為懼惟有君臣益加
勉勗一德一心以承

天眷若允行慶賀則沿襲頌美之虛文大非誠儆之素志

專遣祭告

景陵遣大臣致祭

河神內外大小官員各加一級羣臣恭請

宣付史館

御製碑文勒石得

旨允行七年雲南趙州白巖地出甘泉十一年春廣西鬱

林州瑞泉見鬱林州之富民鄉地湧瑞泉二穴味

甘色清足以灌田爰建神祠虔申祭禱十二年夏

山西介休縣瑞泉見介休縣之上堡村向有水泉
久淤於十一年復見至是又湧新泉可灌民田遂
葺祠致祀以荅靈佑

乾隆七年九月廣西太平府地湧瑞泉時夏仲微
旱至是山泉忽湧灌溉數千畝二十七年七月嘉
峪關外地湧靈泉甘肅嘉峪關外路多戈壁向乏
水泉時大兵經過其地水勢騰湧普濟軍行得

旨照康熙年間托里建廟之例春秋致祀

物類

順治二年五月山東濟寧州產瑞麥自三四歧至十歧河道總督楊方興奏進得

旨時和年豐人民樂業即是禎祥不在瑞麥地方官當益知撫輯惠養元元副朝廷愛民德意四年正月芝草生於河南嵩山河南巡撫吳景道表賀得

旨政教修明時和年稔方為祥瑞芝草何必稱奇

康熙三十九年秋直隸巡撫李光地進嘉禾四十

七年秋山東巡撫趙世顯奏進嘉穀自二三穗至
十穗有差五十一年秋山東通省嘉禾雙穗者三
千六百本

雍正元年四月

孝陵著草生總兵官范時繹奏進傳示廷臣大學士等奏
孝陵新產著草由

皇上孝治之感請

敕付史館

諭曰

孝陵新產著草皆由

世祖

聖祖功德隆盛所致非朕孝思所能感格諸臣陳奏剴切
著照所請行八月河南山東二省瑞穀兩岐雙穗蜀黍

一幹四穗又

內池蓮房同莖分蒂諸瑞疊呈

命宣付史館是年湖廣江華縣學宮生瑞芝雲南新興縣

產五色芝二年八月

厩田產瑞穀一莖二三四穗者十八本

豐澤園生瑞稻一莖二三四穗者二百餘本大學士
等奏

厩田內既見瑞穀之登今

御苑中復覩嘉禾之獲此皆

皇上敬誠所感仁孝所孚上瑞嘉祥請

宣付史館從之三年秋

耜田產瑞穀四年秋

耜田瑞穀一莖雙穗至九穗者共五十本

豐澤園稻穀雙穗至四穗者二百九十餘本

命宣付史館

諭曰國以民為本民以食為天朕即位以來舉行耕耜之禮殫竭精誠為民祈穀於

上帝乃雍正二年三年耜田疊產嘉禾有至一莖九穗者朕心亦以為偶然之事今據順天府尹進呈今歲耜田

所產自一莖雙穗三穗以至八九穗皆碩大堅好異於常穀朕見之心甚慰悅特令宣示廷臣並非以此為祥瑞誇耀於衆也蓋實有見於天人感召之理捷於影響朕以至誠肫懇之心每歲躬耕藉田以重農事即蒙

上帝降鑒疊產嘉穀以昭休應似此八穗九穗之穀豈人力所能為亦豈人君所能強之使有乎此皆

上天俯鑒朕衷故嘉惠黎元而錫以盈寧之慶也五年以各處奏慶嘉禾

命頒嘉禾圖於直省

諭曰朕念切民依今歲令各省通行耕藉之禮為百姓祈
求年穀幸邀

上天垂鑒雨暘時若中外遠近俱獲豐登且各處皆產嘉
禾以昭瑞應而其尤罕見者則京師藉田之穀自雙穗
至十三穗御苑之稻自雙穗至四穗河南之穀則多至
十有五穗山西之穀則長至一尺六七寸有餘又畿輔
二十七州縣新開稻田共計四千餘頃約收禾稻二百

餘萬石且有雙穗三穗之奇廷臣僉云嘉禾為自昔所未有而水田為北地所創見屢次陳請宣付史館朕惟古者圖畫豳風於殿壁所以誌重農務本之心今蒙

上天特賜嘉穀養育萬姓實堅實好確有明徵朕祇承之下感激歡慶著繪圖頒示各省督撫等朕非誇張以為祥瑞也朕以誠恪之心仰蒙

帝鑒諸臣以敬謹之意感召

天和所願自茲以往觀覽此圖益加儆惕以修德為事

神之本以勤民為立政之基將見歲慶豐穰人歌樂利則斯圖之設未必無禪益云又

諭曰今歲各省俱產嘉禾頃鄂爾坤圖拉地方俱產瑞麥有一莖至十五穗之多恭進前來廷臣見之皆以為極邊初墾之地有此上瑞尤為罕覩自古聖帝賢王皆專務實心實政不以祥瑞為尚朕深明此理攢斥虛文而各處所產之嘉禾朕所以宣示中外者蓋因今年為舉行耕藉典禮之初即獲

麻嘉普應是以特為表著以明天人感應之理庶期中外
諸臣益加誠敬從來屢頒諭旨甚明但恐嗣後地方有
司未必人人深悲朕心競尚嘉禾之美名或借端粉飾
致有隱匿旱潦之事亦未可定著將雍正五年以後各
省田畝產嘉禾之處俱停其進獻奏聞六年十月

景陵寶城生瑞芝諸王大臣等表賀言臣等敬觀

景陵寶城所產瑞芝五本光彩輝燦五色鮮潤仰惟

聖祖仁皇帝盛德崇功超越隆古深仁厚澤普被羣生我

皇上純孝性成至誠昭格今茲

景陵寶城特產芝英請

敕付史館昭示萬世

諭曰朕以實心實政為本不言符瑞但今芝草生於

景陵寶城此我

聖祖仁皇帝昭示嘉祥景象朕心不勝感慶准照所請宣

付史館七年十月

景陵聖德神功碑儀柱之右瑞芝產於石上總理

陵寢事務大臣等具奏

諭曰朕從來不言祥瑞惟是建立

景陵聖德神功碑甫經勒石告成而瑞芝即產於碑亭之
右仰見

上天特賜嘉祥以表揚我

皇考功德之隆盛朕心不勝慶慰是年貴州都勻府芝草
叢生又貴州新關苗疆產嘉禾每莖多至十五六

穗刊圖

頒示天下八年正月

景陵寶城山上產靈芝諸王大臣入奏

諭曰

景陵寶城山上首春產瑞芝三本諸王大臣等奏為朕純孝之所感孚朕撫躬自問生平事我

皇考不敢當純孝之名但誠敬之心數十年如一日自御極以來不但一言一事仰體

聖心而後見諸行事即夢寐之中一念舉發從無有知其

不合

聖意而敢存胸臆者諸王大臣等稱朕以

皇考之心為心此實朕之惓忱至云朕以

皇考之政為政朕之才力遠不逮我

皇考舉凡宣猷敷政之間雖黽勉效法究不能企及於萬
一何能致芝草之嘉祥諸臣以此歸美於朕朕不居也

實因

皇考之聖德神功際天蟠地深仁渥澤積厚流光

上天特欲顯示天下臣民是以數年之中三見芝英於

陵寢以今之歷霜雪而挺生當首春而呈瑞稽之史冊更

屬罕聞朕感

上天昭示之洪恩叨

皇考貽謀之景福慶幸歡欣不敢不宣布於衆庶使天下

後世臣民知

上天之眷佑

皇考與

皇考之垂裕萬年者即瑞芝一事明顯昭著信而有徵固如是也著照所請行宣付史館是年秋湖南產嘉禾萬餘本九年秋四川南川縣生瑞穀一本十二莖一莖三穗十二年秋湖廣鎮筸紅苗地方瑞穀徧野又陝甘邊外高臺地方生瑞穀一穗之上重生五六穗十三年八月直隸遵化州及保定縣生瑞穀直隸總督李衛奏報

諭曰據李衛奏遵化州

陵寢垣外地畝及保定縣藉田所產瑞穀多種並有一本
九穗者朕覽之不勝欣慶朕常言地方年穀之豐歉在
乎督撫居官之感召十餘年留心體察歷歷不爽至於
京師畿輔之地則內觀刑部讞獄之公私外觀督撫政
令之得失以為雨暘休咎之本總之感召之責固在督
撫而用人之責則在於朕此中是非得失朕實與督撫
共之所望內外大臣官員等時時儆戒刻刻提撕信天
道之昭垂凜鑒觀之不遠則豐亨有慶災沴潛消萬民

共受其澤矣朕素不言祥瑞久已降旨不令各省進獻
嘉禾今因瑞穀產於

陵寢地方感

天

祖

皇考之昭示福應信而有徵特賜廷臣共觀並將朕敬慎
乾惕之意重加宣諭期與諸臣共勉之

乾隆四年陝西西安鳳翔漢中同州等屬產嘉禾

五年六月河南巡撫雅爾圖奏進穀穗盈尺七月
直隸總督顧琮奏進穀穗盈尺並有

御製詩紀之十一年七月直隸總督那蘇圖奏進穀穗
長尺餘

命宣示廷臣

御製詩誌喜十四年九月山東巡撫準泰進瑞穀圖十
六年春國子監古槐重榮國子監西講堂前有古
槐一株為元臣許衡所手植歲久已枯是歲重榮

枝葉鬱茂大學士蔣溥繪圖以進

御製詩紀之二十五年駐防關展屯田大臣奏進麥萬
穗四十一年山東巡撫國泰奏進泰安縣雙穗穀
御製詩紀之

右植物類

順治二年二月山西交城縣牛產麟十二年靜寧
州有異獸遊於西北野白質黑文按圖即古騶虞
十八年江南定遠縣民家牛產麟

康熙五年四月江西南昌縣民家牛產麟是年鳳
凰見於河南唐縣二十四年山西廣靈縣民家牛
產麟三十二年江南合肥縣民家牛產麟四十七
年山東濰縣牛產麟四十八年九月巴延托羅海
獲瑞鹿

御製鹿角記追紀之

雍正七年七月浙江總督性桂等奏報湖州府歸
安縣民王文隆家育蠶二十七筐有九筐萬蠶同

織瑞繭一幅長五尺八寸寬二尺三寸自然成就
不由人工洵為上瑞

諭曰前據浙江署督性桂等奏進湖州居民家萬蠶同織
瑞繭一幅父老稱為從來未有之奇朕恐小民圖利望
恩或用人工造作而成因令體訪確實勿為所欺昨性
桂等於本地詳加驗看訪察實係自然成就具摺覆奏
廷臣等以蠶桑織絰乃衣被之大原養民之切務今浙
省有此瑞應則人民溫暖可期咸為國家稱慶朕素不

言祥瑞數年以來每遇休徵必倍加乾惕儆戒所頒諭旨至再至三朕愛育元元務期普天率土之人得沾實惠一時希有之物不足以禦飢寒倘蒙

上天俯鑒悃誠錫福黎庶蠶桑普盛衣食充盈乃朕心之所謂祥瑞也八年正月鳳凰見於房山縣直隸總督唐

執玉奏報

諭曰上年據散秩大臣尚崇廩奏稱天台山民李萬良等呈報十一月十三日黎明見山中有一神鳥高五六尺

毛羽如錦五色俱備所立處羣鳥環繞北向飛鳴等語
朕以邊地居民所見事屬渺茫將所奏發還未曾宣示
廷臣昨據總理事道事務散秩大臣常明侍郎宗室普
太奏稱石工監督司官田周呈報正月二十日在房山
縣石梯溝山中見瑞鳳集於峯頂五色俱備文彩燦然
工匠樵牧居民人等約十有餘人莫不共見又據總兵
官管承澤及順天府府尹孫嘉淦等所奏亦皆相同朕
亦俱未宣示廷臣可以知朕心矣今據總督唐執玉繕

本具奏朕思古稱鳳凰乃王者之嘉祥朕撫躬自問功德涼薄不足以致鳳儀之上瑞此事猶疑而未信也十

年山東鉅野縣民家牛產麟山東巡撫岳濬奏報

諭曰山東地方前歲被水百姓不獲寧居去夏今春雨復愆期朕遣官發粟賑恤多方幸未至流離失所即京師去夏今春晴雨亦不均調西北兩路不得已用兵征戍將士露處於外備極勞苦朕心戒懼修省但知感

上天垂象示儆之恩不敢望嘉祥之誕錫今聞瑞麟產於

東省實增愧悚該撫奏請詔付史館宣示中外皆屬虛
文將朕朝乾夕惕對越

上天之愀誠曉諭天下臣民共知之

乾隆十一年浙江杭州府野蠶成繭浙江巡撫常
安入奏

諭曰浙江巡撫常安奏杭州諸府桑間自生蠶繭可取
以織綢名曰天蠶蓋以為瑞也朕謂此范成大詩所
謂野蠶可繅而常安未之知者然不假人力用佐女

紅則信乎授衣之助十六年時蒙古台吉必里袞達
賚獲瑞麇以獻其色純白如雪目睛如丹砂所謂
鹿壽滿五百歲則色白者此其類也次年秋復獲
於巴延和羅圍中均有

御製詩紀之

右動物類

皇朝通志卷一百二十四